

BLOCHZIEHEN
FLIESS
Kinderfasching

D'LABRA
1996

FÜR DEN INHALT VERANTWORTLICH DAS FASNACHTKOMITEE FLIESS

I bin bar Poscht, wia jeder siecht
und eigatli hatt i heind frei
ober ba' m a sönna Trubl
bin i geara ou darbei.

Ja, bar Poscht - döis isch a Löiba
ins geiht's ollna wirkli guat
d' Uniform isch nui und gratis
und ou 's Hemmat und der Huat.

An kluana Nachteil - mogsch itt röida
die Gmiatlichkeit schlöit auf d'Figur
nia kuan Streß, an kurza Diensch
und zwischadurch amol auf Kur!

I sag's olli, liaba Leitla
wer var Orbat hat an Graus
der isch ba ins und hockt am Schalter
oder er tröit Packtla aus.

Der Eignungstest isch zwar itt ohne
Löisa, Schreiba weart verlengt
und wer bar Bonn auf d'Orbat geiht
ba döina hat's für ins it glongt.

Bar Aufnahmsprüfi hon i gnaglat
so an Tag vergiß i numma
Zwölf Bewerber sei mir gwöisa
elf recht gscheida und an dumma.

Mir elfa hobas locker g'schafft
nur für uan war's a Malheur
seitdem fristet der sei Löiba
als Gemeindesekretär.

I - zum Glück - bin zuacha köima
auf sechs fünf uanzanzig Fließ
da derlöib i jeden Tag
viel gonz Luschtis und ou Schias.

Und so lod i enk iaz in
begleitet mi va Haus zu Haus
nocha söichats, was passiert
wenn i meine Brief trag aus.



A Warnung nou - sie galtat ollna
vor die Wonderung beginnt
höibat dicht - wenn's delikat isch
weil sinsch uar mit mir nou spinnt.

Pfiat di Gott, sall tat nou fahla
daß i miascht mit uam auf 's G'richt
oder daß a g'sunta Fotza
londat in meim olta G'sicht.

Kopf indraja, wascha, schneida
töna, färba, nocha föihna
wer Friseurin isch, versteahts
ihre Kundschafta z'verwöhna.

Kimmt sie schpat am Obat huam
kocht sie nou, was jeder mag
an guata Nachtisch weart erwartet
wenn 's migli isch, sogar mit Schlag.

Aber Gott sei Dank geit's heind
zum Koufa schu die nuia Dane
die braucht ma lei in Kühlschränk stella
fix und ferti - und mit Sahne.

Die Leckerbissa sein itt billi
drum findet sie döis gonz vermessa
daß ihr Bua döis guate Cremli
gar itt sauber aus hat g'essa.

Als guata Muater - ohne Zweifel
muaß ma halt oft nach da Frotza
salber mit am kluana Löffel
döin Rest no sauber außakrotza.

Da schreit sie no zum Bua ins Zimmer
da isch an nuia G'schmach im Hondel
döin hon i salt bis heind itt kennt
er schmeckt akkrat asou wie Mondel.

Drauf muaß ihr Bua gonz teiflich locha
hat si döcht der saggrisch Flöigl
in Dani - Becher icha zwickt
uafach seina Fingernöigl.

Wie döis Frauuli derfrot
was sie da im Eifer g'schluckt
Lott sie an lauta Geazger o
Jessas, schaug nu, wie sie spuckt.

Pfiat di Gott, mir lipft's da Moga
und mit ama stilla Gruaß
drah i um und laß an Krotta
weil i schleunigst weiter muaß.



Z'moargaz glei in oller Fria
muaß i heind ins Mühlbach ocha
der Adressat flackt nou im Stall
isch zudeckt mit am mords Trum Plocha

Finster isch die woggli Budi
und voll Mischt die Kallerschtiaga
Spinnawötta da und dött
kuan schiana Anblick - miascht i liaga.

Kiah und Kalbla und ou Goaß
schauga umasinsch in Bohra
und die Zeita sein vorbei
wo die so richti leibi wora.

Denn döis Hah isch nou itt in
die Wiesa sein no gar itt g'maht
wem wunderats, wenn da sei Viech
vor Hunger d' Ouga schu verdraht?

Döis Beirli isch halt im Vergleich
zu ondra olli toll weit hinta
und wenn schu d' earschta Flocka folla
siecht man no sei Fuader binta.

Vom Reimichl an Kalender
war zweifellos für ihn gonz toll
nocha hatt er ou beizeita
mit 'm Hah sein Stadel voll.

Nu - döis kimmarat ihn wiani
vergwunnt si salber ou itt viel
a Stuck hörts Brout mit ama Muas
aus am Pfannla ohne Stiel.

Nu sein Schlepper isch ihm heili
döin fuatarat er wirkli guat
weil er woaß, daß ohne Diesl
döis Gerät kuan Sporz mia tuat.

An Eremit im Jahr 2000
unbeindruckt von der Zeit
da schaugsch wirkli, wenna siechsch
daß es souwas heind nou geit.

Pfiat di Gott, ba sönnä Socha
packt mi fascht der nackte Graus
und i geah mit meiner Post
glei weiter bis zum negschta Haus



Zum Schüler - Renna 95

da hat uar g'meldet ou sein Bua
der Bua will g'winna und der Vater
schaugt ihm voller Spannung zua.

Nachhea weart a bißli g'feirt
es war an dem Tag bitter kalt
a Limo trinkt der junge Fahrer
und an groaßa Schnaps der Alt.

Ma woäß, a sou an Salberbrennta
der kentat uam glei richti in
und nach etliga Portiona
haut's da Vater uafach hin.

Da flackt er iaz, und olls beratet
was sött ma mit dem B'soffna tian
uas isch sicher, in dem Zustand
kann er numma talwearts giahn.

Ins Spital, so weart beschlossa
weart er mit 'm Akja g'führt
die Dökter sölla öppas finda
daß si's Mannli wieder rüahrt.

Mit der Retti geahrt's auf Zams
und ma hängt 'n on a Pumpa
mit deara lott si Schnaps und Bier
außa sauga va da Lumpa.

Am Samsti z'Nocht, da geht's 'm besser
er flüchtet voar da Kloaschterhenna
weil ihm infällt, daß am Sunnti
er ja salber hat a Renna.

Und so schleicht mit roata Ouga
döis Patientli z'Nocht no huam
denn den schiana Club - Pokal
vergwunnat er bei Gott sinsch kuam.

A mords Hallo va seina Kumpl
wie sie 'n z'moargaz söicha köima
aber kniewoach, wie er isch
kann er kuan Pokal mitnöihma.



Z'langsam war sei Zeit, ganz logisch
ganz enttäuscht steahrt er im Ziel
und daß 'm iaz glei Zacher kama
zum salla fahlat gar itt viel.

Pfiat di Gott, du Schirennläufer
bleib voar da Renna abstinent
nocha hamschtarasch Pokale
du als Sieger permanent!

A Ehepaar döis mecht verroasa
da böitlat ma da Schwiegersohn
zum Bouhnhof sött er die zwoa bringa
da kam ma billiger darvon.

Freili isch der inverstonda
fiaht sa ocha, wie sie 's wölla
halft ana nou Kufer troga
daß bequem sie 's hoba sölla.

Ma besteigt döin Zug, döin schnella
und ma suacht ou glei an Platz
der Schwiegersohn tröit hintanocha
's gonz Gepäck - döis isch an Schatz!

Da kimmt uar mit am roata Kappla
"Fertig" schreit er voar zur Lok
und wie ma döis im Zug drin heart
kriagt der Schwiegersohn an Schock.


Iaz an Pfiff vom Fahrdienstleiter
im Waggon da geit's an Ruck
und er setzt si in Bewöigi
Huament, da geit's kua Z'ruck.

Da hocka sie iaz olla drei
uar isch blaß - die uana locha
weil er muaß - gonz wider Willa
a fahrtli bis af Innsbrugg mocha.

Für d' Huamfahrt breicht er nou a Galt
on sou öppas hat er itt denkt
und so schnauft er sichtli auf
wie ihm's der Schwiegervater schenkt.

Seitdem steaht bam junga Mann
die Voarsicht wohl an earschter Stöll
sei Muani isch, daß der wo fortfahrt
sein Kufer salber troga söll.

Pfiat di Gott, du Zugbegleiter
sou a Fahrtli tuat itt schoda
so hosch könna deina Leit nou
z' Innsbrugg halfa bam Entloda.



Im Langaz, wenn der Schnea vergeaht
und d' Wiesa weara wieder grian
muaß d' Intressentschaft va da Baura
zum Frühjahrsputz auf d' Olba gian.

A Menga Plunder weart da g'richtet
Pickl, Hocka, groaßa Soga
Schlöigl, Schaufla und Zeppin
weara iaz auf Gouglas troga.

Döis hat olls an guata Zweck
weil d' Wöig und Zäune weara g'richtet
Unterholz und dürra Grogga
weara auf an Haufa g'schlichtet.

So kann döis Viech da gonza Summer
anstandslos ga Fressa gian
weil kua Windwurf und kua Wurzla
ihna mia im Wöig umschtian.

Soweit - soguat, nu hat mi g'schteart
daß earsch im fünfaneunzger Jahr
so mancher halbverbrennte Haufa
nöib'm Wöig zum Söicha war.

Äscht und Bamla, schwarz, verkouhlt
sein Massa umanonder g'löiga
und a dunkla Suhr isch g'runna
va da Häufa weck im Röiga.

Wer d'Orbat holbat hinterlott
der kann woll salt itt z'frieda sein
auf jeden Fall geit döis kua Loub
vom Verschianderungsverein!

Für viela war döis am Jakoubi
foscht as wie a Faust auf d' Ouga
mancha hoba 's Köpfli g'schittlat
sall isch wirkli nitt darlougä.

Pfiat enk Gott, öis Umweltsünder
da gloub i, geit mir jeder recht
daß jeder Gast, der Baur und 's Viech
a saubers Gougler Albli mecht.



Zwischen Larch und frischem Gras
steht am Silpahof a Haus
und dött lodet der Besitzer
manchmal seine Freund zum Schmaus.

Zwo junga Mander hat er troffa
ou ba der Gelöigaheit
iaz fragt er, ob döis migli sei
an Larch um z'tian in negschter Zeit.

"Logisch" söit der uan zum ond'ra
und bam Pfiata mit 'm Huat
verspricht ma, daß ma bald döin Larch
ihm voar d'Hütta löiga tuat.

Iaz hoba die zwoa guata Holzer
döin Boum umtoun und glei darschnitta
und wiani schpater leit döis Holz
ou schu g'schpolta voar der Hütta.

Freundschaftshalber - denkt ma si
iaz tian mar 's fruatli ou no hocka
na können mir döin gonza Haufa
glei in sei Schupfa ichapocka.

Voar 'm Haus, da köihrt ma zama
döis Sagmehl und die dürra Rinta
sie wölla ja, daß der Besitzer
itt selber muaß bar Onkunft schinta.

Wocha daurt's da kimmt der Hearr
vom Vorarlberg retour
und entschliaßt si zur Erholi
für a g'sunta Hütta - Tour.

Ihn wundrat's, daß es neb 'm Haus
an frische Stock zum Söicha geit
und der Boum, der da drauf g'schtonda
niana umchanonder leit.

Saggra - denkt er, hat mir öpper
mein schianschta Larch gonz huamli g'
sou a Frechheit g'heart geahndet
i wear glei d' Gendarma houla.



Icha wieder in sein Woga
mit Karacho z'rugg ins Tal
dött trifft er uan va seine Holzer
iaz geht a Liacht ihm auf afsmol.

Ma derzöihlt, wie 's gwöisa isch
döis Mißverständnis weart geklärt
sou a Kameradschaft hat 'n
woll recht überzeugend g'ehrt.

Pfiat di Gott, du Banka-Profi
ma darf itt olli 's Schlecht onnöima
weil manchmal ou gonz schiana Socha
unverhofft darzwischat köima.

schtoula

Daß d' Fließer Jager tüchti sein
sall isch jeder voll im Bild
weil sie mit viel Aufwond
höga 's klua und ou döis groaße Wild.

Und isch amol a Böckli z'schiaßa
hockt ma stundalong im Wald
göigaseiti geit's an Troascht
"Wart nu nou - iaz kimmt er bald".

Drum braucht döis niemart wundara
daß im Fall, daß uar weart g'schossa
glei var gonza Jagerschaft
sou an Treffer weart begossa.

Bier und Wein - voar allem Schnaps
sei zum Feira guat geeignet
und sou ehrli sein sie olla
daß döis überhaupt kuar leignet.

So hat amol uar ohna Gniaga
g'feirt und g'soffa bis in d' Nacht
in Anbetracht seiner Promille
hat man schließli huamwearts bracht.

Aber scheinbar war döis z'friah
"im Bergland wars iaz nou famous!"
er schworglat auf sei Vespa zu
und fahrt in Richtung Schatza los.

Wieder weart iaz saggrisch gurglat
viel Alkohol verdünnt sein Bluat
lott döin Reachbock ihn vergessa
er woaß numma, was er tuat.

Trotzdem isch er nou der Muani
daß er sein Fahrzeug lenka kann
aber talwearts bam a Meirla
isch er schließli keßlon.

Zwoa brochna Rippa als Trophäe
nimmt er va dem Unfall mit
der Alkohol sei gar itt schuld
sondern auf der Stroß der Splitt.



Pfiat di Gott, trinkfester Jager
wenn du saufsch bis zum Exzeß
bring i dir woll bald a Briafli
var BH, und zwar "Expreß"!

A Hausfrau hat's heind numma leicht
's Haus sött olli sauber sein
böigla, sauga, Zuig inkoufa
Brot und Schmalz und Bier und Wein.

Da muaß ma wirkli zeiti auf
viel zu schnell vergiahn die Stunda
flicka, naja, öppas kocha
's Essa sött ja ou guat munda.

Zudem sött ma ou no spora
ma verwaltet streng döis Galt
und was halbwegs machbar isch
döis erledigat ma salt.

Hin und da fallt ou was on
was chemisch g'reinigt weara sött
an Anzug und die schiana Hosa
und a groaßes Federbött.

Freili isch döis gar itt billi
a Idee kimmt da in Sinn
i spor mir die paar hundert Schilling
i hon ja salt a Waschmaschin.

G'söit und toun - döis Türli off
und icha mit dem Bett voll Dauna
mit Mega Perls und Ultra Weiß
weart döis sauber, wearats stauna.

An Druck auf 's Knöpfli, 's Wasser off
langsam draht si die Maschin
und wie der Voargong ferti isch
isch döis schiane Bettli hin.

Was üברי bleibt, isch nu an Klumpa
unansehnlich - fascht zum Pleara
iaz woäß die Frau, daß mancha Socha
wirkli chemisch g'reinigt g'heara.

Ou d'Waschmaschin hat Potscha g'streckt
der Versuch war wirkli tuir
sie nimmt, was üברי bleibt vom Bett
und verbrennt olls zomm im Fuir.



Pfiat di Gott du Sparefroh
hoffatli hosch g'learnat draus
i wünsch dir, daß dei Reinigung
bam negschta Mal fallt besser aus!

An Auftritt var Musikkapella
braucht jedes Mal viel Voarbereiti
ma kündigt on döis groß Konzert
am Plakat und in der Zeiti.

Im Gallmigg, da steigt a Feschli
vom Skiklub mit viel Prominenz
d' Musi kriagt den edle Auftrag
daß sie d' Stimmung nou ergänz'.

Der Obmann und der Dirigent
hat jedn uazacht strikt verpflichtet
daß er voar dem Platzkonzert
si's G'wand und's Instrument hea richtet.

Normalerweise haut döis hin
nu döimal isch es uam passiert
daß er glatt mit laara Händ
zu dem Auftritt mitmarschiert.

Peinli isch die Situation
und voar ollem geit's kua Schummla
denn jeder hat auf Anhieb g'söicha
"Jessas, döina fahlt d'groß Trummla!"

Der Taktstock zoagat steil nach ouba
und jeder spielt mit Avision
trotzdem fahlt für jeden Kenner
der dumpfe, schware Pauka - Ton.

Itt verlöiga isch der Trummler
schaugt unbeindruckt ummadum
als Ersatz schreit er im Takt:
"Bum - bum - bum, bum, bum!"

Nachhea hoba olla g'schmunzlat
"Wie kann ma so vergeßli sein
isch der schu a sou vekalkt
oder macht's ba ihm der Wein?"

Seitdem tia der groß Tambour
jeden Tag viel Knoufli essa
Knoufli sei recht guat für 's Hiara
und sou halft er geg's Vergessa.



Pfiat di Gott, du Pauka- Schläger
sönna Socha sein fatal
sötsch dei groaßa Trummla
numma vergessa im Musiklokal!

Ja, Vergeßlichkeit isch öppas
wo ins olla manchmal plogat
weil in ins'ra Hiarazella
der Zond der Zeit schu manchmal nogat.

So isch mir salber schu passiert
daß i hinhock zur Marend
und da merk i earsch bam Kuia
Teifl, wo sein meina Zend!

A anders Mal im Zugabteil
vergiß i glatt mein nuia Huat
im Gasthaus, da vergiß i 's Zohla
und so öppas geit beases Bluat.

I bin schu zum a Dokter gonga
daß er mi va dem befreit
aber er söt fronkafrei
daß es wiani Hoffni geit.

Und ou a Frau vom Silberploun
hat diesbezügli Schwierigkeita
manchmal sei döis augascheinli
und sie tia 's ou nitt bestreita.


So isch sie am a schiana Tag
übern Doarfplatz hea maschiert
und jeder, wo ara begöignat
hat auf ihra Fiaßla g'stiert.

Und iaz lenk i ou mein Blick
var Oberweita zu da Fiaß
zwoa verschied'na Patschla siech i
links a blaus und rechts a grias.

Glatt war döis a ungleichs Paarli
konnsch dir denka, olls hat g'lacht
sodaß mit roasaroatem Kopf
die Fließer Frau hat kehrt enk g'macht.

Aucha über 's Toubl - Brüggli
isch sie g'sablat wotta schnell
daß itt gar a sou viel Leit
die Blamage dersöicha söll.

Pfiat di Gott, da hat sie denkt
iaz g'hear i zu da Forbablinta
iaz muaß mir halt mein liaba Mann
olli meina Schiachla binta.



Manche Gäscht in inserm Dorf
mechta d' Freizeit g'scheit verbringa
im Summer isch döis gar itt schwar
da kann ma wondara und singa.

Uan Betrieb, an Hotelier
hat für döis a guata Hand
führt seina Leit mit Wanderstecka
auf und o durch's ganze Land.

Geg's Wondara geit's ou nuit z'röida
nu sein sie manchmal z'faul zum Giahn
da siecht ma nocha drin im Wald
an Haufa Auto umcha stiahn.

Ba der Gelöigaheit da weart
der Waldaufsöicher ziemlich wild
drum hat er, ohna long zum Denka
an mords Trum Boum glei niederkillt.

Er fällt döin Boum quer über d' Stroß
unübersöichbar - als Blockade
sodaß die Huamfahrt va da Gäscht
endet an der Barrikade.

Döis war woll a deitlis Zeicha
für olla, wou 's betroffa hat
seitdem heia sie ihr Auto
wohlweisli bam Hotel stiahn glatt.

An lötschta Anlouf weart nou g'startet
bar Agrar da suacht ma on
ob ma zwanzg Genehmigunga
für seina Gäschtla hoba kann.

Aber eigatli wars klar
daß die nitt bewilligt weara
weil geführta Wonderunga
uafach z'fuaß erledigt g'heara!

Pfiat di Gott, öis Wonderwöig
döis war sicher a Malheur
wenn sogar der lötschte Winkl
überrollt wur vom Verkehr.



Bam Kinderfasching 92
Mensch, döis war a luschtis Treiba
kua uanzis Kind hat - sall isch g'wieß
daham bar Mama wölla bleiba.

Olla köima als Maskierte
als Hexa, Frosch und Sanitäter
als Prinz und fescha Königinna
oder gar als Struwelpeter.

Rauchfangköihrer, Biene Maja
Dökter, nou mit Holzmarkousa
Wilderer und Sambatänzer
mit groaßa Hiatt und schiana Housa.

So ziacht der forbapträchtig Zug
vom Mühlbach auch mit Trara
es gfröiba si nitt nu die Kinder
ou d' Nala und der Opapa.

Sowas braucht viel Voarbereiti
baschtlat weart im Kindergorta
in da Schuala und daham
die Kinder könnas kaum darworta.

So an Insatz isch zum Louba
weil Lehrer, Kindergortatanta
wochalong si überlöiga
was sie olls nou mocha kannta.

A Preisverteili geit's am Ende
G'schäftsleit geit's in Fließ spenditta
so weara schiana Preis vergöiba
earschta, zwoata und ou dritta.

Der Bürgermuaschter und der Pfarr
unterstütza die Jury
was uam g'fällt, weart hoch bewertet
mit viel G'fühl und Akrebie.

Leider war ua Lehrerin
arg enttäuscht, ma tat's itt glouba
und hat si durch die gonza Leit
va hinta zur Jury voar g'schouba.



Olls schaut hea zur Pädagogin
schimpfa tuat sie, schreia, spucka
und die hoacha Hearra miaßa
döis Gezeter uafoch schlucka.

Gaschiga weart döis Palaver
insem Bürgermuaschter peinli
er -hofft, daß sie si z'frieda gab
mit am Tausat - Schilling - Scheili.

Aber, wie döis ou nuit nutzt
siecht ma's noatgedrunga in
daß göiga die kua Kraut isch gwochsa
was ma tuat, isch ouhna Sinn.

Pfiat di Gott, du Durchg'schudierta
da isch dir der Gaul darvon
bisch döcht sinsch a recht a Feina
wo ba ollna kimmt guat on!

A Kluaviech Beirin, nochnat da
hat a Fröid mit ihra Henna
und so denkt sie, wie die Bulla
nou viel greaßer weara könna.

Ma kimmt zum Schluß bam Überlöiga
an Bio - Giggalar muaß hea
no war der Nachwuchs g'sicharat
im Summer, Herbst und ou bam Schnea.

Die Fröid isch groß, wie sie uan findet
der Milian hat uan verkouft
's Herz schlöit heacher, wie sie siecht
wie der da Henna nochalouft.

"Hui, der Giggalar isch guat
der weart mei gonza Zucht veröidla
döin siechsch va z'moargaz bis auf d'Nacht
auf meine Henna umchawöidla!"

Afamol weart döina Henna
ollzu schwar des Houhnes G'wicht
und sie fonga on, ihn z' picka
in sein Orsch und ou ins G'sicht.

Anfangs wöihrt er si nou tapfer
aber ba der Übermacht
bleibt ihm gar nuit anders übri
als daß an Fluchtversuch er macht

Und so louft mit lautem Kraja
er in Richtung Widum - Brunna
Hintanocha olla Henna
die ihm gar kua Pausa gunna.

Wie döis Beirin endli gwohnat
probiert sie 's Federviech zum Fonga
döcht vergeaht no wohl a Zeit
bis sie oll in Stall sein gonga.

Roat im G'sicht kimmt iaz ihr Mannaz
packt döin Giggalar bam Kroga
auf 'm Hackstock mit am Beil
weart ihm glei der Kopf o g'schloga.



Seitdem goggara die Henna
ohna Bio - Huhn im Stall
und sie löiga iaz voar Fröid
wunderschiana Oala oll.

Pfiat di Gott, du Bio - Beirin
laß wöiga dem da Kopf it hänga
in jedem G'schäft geit's Bio - Oar
schian verpackt, in jeder Menga.

Auf 'm Weg zur Barbra - Kiarcha
isch an Mann mit Kind und Frau
plötzli bleibt döis Biabli schtian
und es schaukt zur Mama au.

"Mama, i sött brunza giahn
länger höib i's numma aus
ziach mir schnell mei Housa ocha
i brunz oucha zu dem Haus!"

In der Zwickmühl isch dia Muater
denn sie hoast döin Plan itt guat
trotzdem findet sie 's no besser
als wenn er Housabrunza tuat.

So tuat sie 'm off sei Housatürli
halft 'm 's Zipfali nou suacha
und döis Biabli mit zwoa Johr
lenkt sein Strahl zur Maura zuacha.

"Mmh" - döis Biabli isch erleichtert
weil sei Blasli numma zwickt
aber afamol an Brüller
daß d' Mama und der Bua derschrickt.

Der Haushearr hat döis olls dersöicha
und er wöttarat gonz laut
a sou a Frechheit va dem G'sindl
hei ihm 's gonze Haus versaut.

Es folla mancha schiacha Wearter
sou a Muater sei nuit weart
und sie söll si künfti merka
daß si döis im Dorf itt g'heart.

Wie ma siecht - an hoagla Fall
i woß itt, was i sogä söll
wo 's Biabli hinbrunzt hat - isch heind
vom gonza Haus die säubrigscht Stöll.

Pfiat di Gott, was war earsch gwöisa
wenn a Kuah hatt zuacha brunzt
nocha hatt er könna schreia
"Iaz isch mei gonzes Haus verhunzt!"



Überall auf inser Walt
hat 's schu olli Leitla göiba
die si auf a Sunnti - Brota
tagelong darvoar schu fröiba.

Iaz hängt döis o va viel Faktora
wia 's a sou an Brota geit
Ob bam Billa oder Geiger
kostet döis viel Galt und Zeit.

So geit's ou heind no ab und zua
uan,der wildarat vermessa
weil döis preislich - gar kua Frog
isch und bleibt döis billigscht Essa

So isch ou z'Fließ uar wochalong
ohne Korta fescht auf d' Jacht
aber leider hei er nia
an richti fetta Treffer g'macht.


Aber 's Glück steaht ihm zur Seita
weil 'm an Dox in's Auto springt
döin er nocha voller Fröid
glei zu seina Kumpl bringt.

Mensch, da staunt ma,gratuliert
feirt döin "Abschuß", Weidmannsheil!
und der überfohra Dox
leit im Kofferraum darweil.

Iaz mechta sie ihn halt nou söicha
stolz sperrt er den Deckel off
döis toate Viech latt iaz an Rochler
markerschütternd grell und schroff.

"Hardigatti,der war hin
wie 'n vo der Straß auf g' nouhma!"
aber wie ma 'n siecht, putzmunter
isch er glöiga lei im Kouma.

Reißaus nöihma iaz die Mander
mit der Fröid isch es vorbei
sie renna über d'Ouhnawonta
gonz darschrocka olla drei.



Pfiat di Gott, du Kluankaliber
teifflisch hasch di da blamiert
sou isch es, wenn mit fremda Föidra
uar sei Hiatli geara ziert!

Z' Zondersch dinna auf der Olb
war a nuia Hiitta z' bauer
drum hat miaßa die Gemeinde
si um an Aggregat umschaua.

Da kriagt ma uan, schaug wie komott
var Fließer Fuirwehr geara z'leicha
sodaß ma mit dem Stromerzeuger
guata Fortschritt kann erreicha.

So steagt, ma staunt, in kurzer Zeit
fix und ferti da die Hütta
stolz kann iaz der Bürgermuaschter
olla zur Eröffni bitta.

D' Musi spielt und g'redt weart viel
g'sunga, trunka und ou g'essa
so hat döis Notstromaggregat
uafach jeder glatt vergessa.


Earsch bar negschta Abschnitts - Übung
wo d' Fuirwehr z' Londegg mocha sött
hatta sie döis guat Gerätli
geara wieder selber g'hött.

D' Fließer kriaga den Befehl
die Saugstell taghell zu beleichta
iaz muaß der arme Kommandant
döis Mißgeschick natürli beichta.

So muaß bar Übung döis Objekt
trotz der Fuirwehr glatt verbrinna
's Notstromaggregat steagt nämli
olli nou im Bauhof dinna.

Döis macht da Kommandant recht zoarni
und es geit Reklamationa
seitdem seia drastisch g'stiega
var Gemeinde d' Subventiona.

Pfiat di Gott Gemeindeamt
z'rugg göiba war woll Chrischtapflicht
was hatt die Fuirwehr sölla tia
wenn wirkli a mords Fuir ausbricht!



Im Urga dunta - überm Inn
dött, wo d'Sunnastrohla rar
fällt uam in, daß ba seim Auto
wieder 's Öl zum Wechsla war.

Und weil er grad asinsch nuit voarhat
geht er auße zu seim Woga
draht döin Ablaßschraufa off
und olls rinnt auße ohna Ploga.

Iaz breicht er halt a drei, vier Liter
va guatem Öl zum Nochaschitta
aber, wias der Teifl will
soufl Dousa hat er itta.

Isch itt tragisch, denkt er si
a Tankstell isch ja gar itt weit
wou's jeda Menga Motoröl
und ou a Bierli z'trinka geit.


Zwischazzeitli - oh du Schreck
denkt si mämlü grad sein Frau
iaz wear i schnell auf Londegg fohra
döis passat mir heind gonz genau.

Sie löit si schnell da Montel on
da Inkoufskoarb nou untern Arm
Zündung on, es geht dahin
und longsom weart 's Matöirli warm.

Ma pfeift a Liadli übers Pfötschli
plötzli tuat's an dumpfa Schnoll
und, obwohl sie gor itt bremst hat
stiahn afsmol die Radla oll.

'Huara Glump, was isch denn wieder
wegrum muaß döis mir passiera
wenn i huamkimm weart er sogä
du fahrsch ja olli ouhna Hiara!"

An Seufzer zum Christopherus a
Stoaßgeböit zum Jesuskind
Aber 's uanzi, was si zoagat
daß an Haufa Rouch iaz kinnt.



Wia 's Mannli huam kimmt mit 'm Öl
siecht er blaß die laar Garage
und er ahnt bestimmt sofort
die unausbleibliche Blamage.

Pfiat di Gott, am salla Obat
war i liaber itt darbei
weil ma - jeder weart's verstiahn
nitt viel mitnonder g'röidet hei.

Bam Stammtisch Zoll, da tuat si was
ma kümmerat si um die Göscht
und fahrt mit ihna, wie besprocha
nach Müncha auf 's Oktoberföscht.

Wohl an Tschippl Leit sein g'wöisa
Mannla, Paarla, mancha Frau
und ma stürzt si ohna Zögern
mittlat icha in Radau.

Ua Maß ums onder weart bestellt
döis hat ollna wirkli taugt
da braucht's kuan wundara, wenn mancher
a bißli überkreuz drinschaugt.

Die Stimmi steigt, es isch phantastisch
ma singt und schunkelt - kuar kriagt gnuag
da und dött hearsch laut uan schreia
"Kellarn, bring mir nou an Kruag!"

Leider - olls isch uamol ferti
sein bald aus die netta Stunda
der Schafför vom Omnibus
sammlat zama seina Kunda.

Die meishta könna salt nou giahn
ab und zu da weart uar zoucha
zum Glück für döin isch es itt weit
bis zum groaßa Parkplatz oucha.

Uar muaß z'viel darwurscha hoba
verzweiflat hei da Bus er g'suacht
aber stundalong umsinsch
konnst dir denka, der hei g'fluacht.

laz isch ihm gar nuit übri blieba
als daß er si die Zeit vertreibt
weil's über Nocht, döis woäß ma ja
kuan Zug auf Londegg icha geit.

Am negschta Tag, da kimmt er huam
knill und mit zerdrucktem G'wond
an Hunger in der laara Wompa
und im Hals an huara Brond.



Pfiat di Gott, du Longzeit - Föschter
sou an Ausflug hat's in sich
voar allem, wenn bam Huamweartsfohra
olla lossa di im Stich.

Der Schiklub Fließ isch jeden Winter
sehr aktiv für seina Leit
aber, wenn der Schnea aweck isch
kimmt a ruhigara Zeit.

Schi und Steckä, Start und Ziel
weara für a Weil verraumt
und für die, wo's intressiert
weart an Ausflug onberaumt.

Im lötschta Jahr hat man beschlossa
daß die Fahrt auf Salzburg geht
an groaßa Omnibus isch g'fohra
schian kommot und ohna G'neat.

Für Unterkunft und ou Verpflöigi
braucht si niamart kümmara
in Filzmoos sein schu bereit
ganz wunderschiana Zimmara.

Jeder fröbt si auf a Obat
da geht's nämli lushti zua
und earsch long nach Mitternacht
löit ma si ins Bett zur Ruah.

Am negschta Tag - es isch nou dunkl
muaß uar dringat auf's WC
im Kopf isch er no katzatirmli
wia döis isch, döis woaß ma eh!

Er fühlt si grad as wie daham
und krablat außa aus 'm Bett
da Gong entlong, die earscht Tür rechts
da isch ba ihm daham 's Klosett.

In da Ouga Gregga Nocka
geht er icha durch die Tür
aber niana siecht er 's Klo
döis kimmt ihm iaz seltsam für.

Voar ihm steacht a junga Frau
der Mannaz weart schlagarti munter
sie tröit am Hals a Kettnali
aber überhaupt nuit drunter!

So a Mißgeschick, a schians
kimmt ihm absolut gelöiga
weil ou Mander um die siebzig
so an Anbklick geara möiga.



Er saugat auf mit Kennerblick
olls, was es da zum Söicha geit
da unterbricht die hübsche Frau
sein groaßa Wunder, weil sie schreit.

Iaz flüchtet er, und im Pyjama
zoagat öppas steil nach ouba
und so hat er - mit Gewalt
sein Johannes ocha g'schouba.

Ja, der "Spitzbart" döin er g'söicha
geht ihm numma aus'm Kopf
ou die Busa, die zwoa stromma
beschäftiga döin geila Tropf.

Auf der Huamfahrt weart betrachtet
das Gelände und d'Natur
aber er denkt olli nou
an die wunderschia Figur.

Pfiat di Gott, du Mann im Glück
sönna Zuafäll, sönna netta
köima uam zu selta unter
auf 'm Wöig zu da Toiletta!



Iaz hon i enk wouhl long derzöihlt
was si asou ereignet hat
und wie i siech, bin im Moment
i schu bam ollerlötschta Blatt.

Für enker Köima und d' Geduld
mecht i enk no saggrisch donka
tiat bam Huamgiahn - kurz nach holba
itt gar asou durch d' Gossa schwonka.

Meina Wünsch sein kurz und bündi
bleibat g'sund die negschta Johra
holtat zama in der Noat
und hupfat mar itt z'früah auf d'Bohra.

In inderm Doarf sött 's aufwärts giahn
Fremda sött's an Häufa göiba
und jeder söll föscht orbada
nocha lott si ou guat löiba.

D' Lehrer sölla tüchti bleiba
der Bürgermuaschter so agil
daß er, was er ong'fongt hat
ou ganz locker bringt ins Ziel.

Spora weara olla miaßa
und der Pfarr, der sött ins söigna
daß mar wiani sündiga
und am Tuifl nia begöigna.

Tiat da Hearrgott itt vergessa
und seid nett zu da Verwondta
tiat 's Fließer Dearfli sauber pflöiga
d' Acker und ou d' Ouhnawonta.

Pfiat enk Gott, öis liaba Fließer
geiht mit mir no mit ins Zelt
an Fließer Schnaps - so hon i g'heart
sei der bösch, var gonza Welt!

